

# JÙK YEENDÒO GWIZHÌT GWEEDHAH: GINJIH GADAAGHOO GWICHÌT TS'ÀT GINJIH GADAAGHOO GWICHÌT TS'ANUU

***Yakaih: Canada Yeendòo Dagwiheech'aa Iinch'iits'at Gugwinah'ii*** t'at Geenjit Nadhat Kat nagwidadhat ihlak gwizhìt Arctic gugwinah'in gwi'dinieht'ee t'iinch'uh. Yi'eenoo guukè' gichuu'aih kwaa aii geeghee nan ts'at gwinagoo'ee gwiint'oh nihàh t'igiinch'uu aii geeghee yakaih yi'eenoo North gwa'an gugwiindai' kat hàh gwiinli' k'iighè' jii dinieht'eh uuzrii gugwiłtsaih. Yeendòo Canada gwizhìt north gwa'an diiyeenjit gwiinleii gwihee'aa geenjit gwizhìt gòo'aih. North t'at Canada eenjit yeendoo gwiijiinchii goonlih. Jidii geenjit tr'igijikhii gwijiinchii gòonlih; dagwiheedy'à'aa ginuu iinch'its'at akòo digwiheedyà'ah.

Arctic Gwidagwidij'è' Gwinjik T'igwiheech'ah (APF) gwizhìt nihk'ii tik gòo'arii gwinjik gwitr'it gugwitahtsah. Crown-Indigenous Relations Eenjit Iisrits'at Chit ts'at Intergovernmental and Northern Affairs Eenjit Iisrits'at Chit geenjit gugwidint'oo dài' akòo diginuh, "Arctic gwichìt hàh nihàh chit tr'iheedilyaa ts'at north gwa'an diiyeenjit gòo'arii, chit geenjit gòo'arii ts'at nihlinehch'i' gòo'arii gwizhìt tr'igwinah'in tthak hàh diits'at tr'igiheendał gwiheelyah. Jii diniidit'oo guuzhik aii APF diits'an tr'altsaih kwàh. Jii dineht'eh t'at, Arctic gwidagwidij'è' yeendoo tthak heelyaa geenjit gwiits'at tr'iheendał gwiiniindhanh.

Canada gwizhìt North eenjit tr'igijikhii ts'at dagòonch'uu gwizhìt tr'igwinah'in' dài' gwiinlit nihk'it tuguunch'uu gugwinah'in', nits'òo north gwizhìt t'aniinch'uu kat guuveenjit gòo'arii aii geeghee ts'at Canada gugwehdeendał kwaa ts'at yee'òk kaiik'it gòo'arii hàh gwiinzii t'igwiheech'yaa gugwinah'in'. Niinzhùk gwizhìt gugwinah'in' ts'at internet t'agijahch'ù' k'iighè' gwiieendoo gwiinzii gwizhìt gugwinah'in', jii k'iighè', Geenjit Nadhat Kat li'hàh geenjit t'igiheech'aa ts'at tth'aih hee geenjit gwitr'it gugwahahtsaa ts'at guk'andehgahnahtyaa geenjit gwiiniindhanh. North gwa'an t'aniinch'uu kat srii tr'igwiheendaii, tseedhòh tr'ahdaatsaa, zheh tr'iheedy'a'aa, diigwehdeendał kwaa, gè'tr'oonahatan, shìh tr'iheedy'a'aa, yi'eenoo nits'òo tr'igwiindai', diiginjik, nits'òo nihts'at tr'igijikhii, diinagòo'ee ejùk t'igwinjik, ejiich'ii neetr'aazhik ts'at aii gwiieendo leii gwizhìt gòo'aih. Jii Arctic t'at nan gwiieendoo gwiinchii diinch'uh. Jidii geenjit gwi'tagwij'ee jùk chit nihlinehch'i' gòo'arii guk'aginahtih. Jii APF yeendoo gwiheelyaa jì', jii north geenjit khehłok chit tr'ooheendał ts'at iisrits'at jii north eenjit gwiinzii nihàh chit giheedilyaa niidadhàn.

Chit tr'iheedilyaa eenjit dagwidij'è' tr'igwahtsii dài' north gwa'an Dinjih Zhuh ts'at Dinjii Zhuh nilii kwaa, kheenjit nits'òo gwihee'aa gehdeenjah. North gwizhìt t'aniinch'uu kat jidii guuveenjit gwihee'aa agidanh akòo digehdeenjaa ts'at geenjit chit giheelyaa niidadhan - North gwa'an dagwiheedy'a'aa gwinuu dài' North gwizhìt t'aniinch'uu kat khè' dagwiheedy'a'aa gehdeenjah, North gwizraih geenjit t'iheech'ah ts'at North khè' akòo digehdeenjah.

Chit iinli', Charlie Watt jii Special Senate Arctic Committee altsaii geenjit mahsi' vaadinuh. Aii geeghee, geenjit nadhat kat, geenjit gwitr'it t'agugwah'in kat, diits'anuu kat ts'at gwizhìt gugwinah'in kat chan mahsi' guuvaadinuh. Jii kat tthak geenjit nadhat kat ts'at gwiinlit gwiits'at tr'iginiinjik. Juudin gwink'oo tr'altsaii, juudin ts'an gwiinli', ts'at juudin gwink'òo uunjii jii geenjit t'atr'ijahch'ù' chan mahsi' guuvaadinuh. Canada gwats'at t'aniinch'uu jii dineht'eh eenjit ejiich'ii gałtsaii uu'òk tr'ahnah'aa geenjit gwiieendoo shòh tr'iinlih. Juudin nikhwàh gugwaandak ts'at nihtat nachidadal guuzhik juudin shòh hàh nikhwits'at gijikhii tthak

chan mahsì' choo guuvaadinuh. Jii gwizhìt gwinyaa'in k'iighè' dagwiheedy'a'aa gwiiniindhan geenjit dadohnuu gwijiinchii ts'at t'atr'ahdahch'ah.

North gwizhìt t'aniinch'uu guuveenjit gugòontrii ts'at Arctic, iisrits'at Canada gwizhìt gòo'aai geenjit gwijiinchii geenjit tthak gwijiditth'ak k'iighè' Arctic geenjit jii Special Senate Committee, Senate of Canada gwizhìt li'hàh heelyaa niidadhanh.



